

詩

學

女

為

詩學女爲卷十二

歙汪梧鳳著

國風

陳太皞處戲氏之墟帝舜之胄有虞閼父者爲周武王陶正武王賴其利器用與其神明之後封其子嬀滿於陳都於宛邱之側是曰胡公以備三恪妻以元女大姬其封域在禹貢豫州之東其名廣平無名山大澤西望外方東不

及明豬今爲河南陳州府治

宛邱四則

序宛邱刺幽公也淫荒昏亂游蕩無度焉地理志周武王封嬀滿於陳是爲胡公妻以元女大姬婦人尊貴好祭祀故其俗巫鬼陳詩曰坎其擊鼓宛邱之下亡冬亡夏值其鷺羽又曰東門之枌宛邱之栩子仲

之子婆娑其下此其風也班史以二詩爲巫風蓋習俗使然不獨幽公之過

宛邱在陳州府南三里高二丈水經注宛邱在陳城南道東王隱曰今漸平矣不知所在据此則毛傳四方高中央下者得之若爾雅邱上有邱曰宛邱郭璞謂中央隆峻狀如一邱豈有漸平之理

續詩傳鳥名卷曰鷺水鳥亦名白鷺通體潔白翅背上皆有長翰毛可爲飾用不止頂上戴羽絲也其又名春鉏者陸佃曰鷺好涉淺水以頂作低仰而行如春如鉏也鷺羽卽鷺翮以其羽爲翮耳舊謂羽爲舞

者之翳翻爲舞者之導則不然爾雅翻謂之翳翳謂之翳李巡孫炎皆謂是舞者所執之羽但有異名者以羽舞所用原有兩羽其名翟者是雉羽但執之以舞而名翳者是鶩羽則以之爲翳而執之以指麾於舞者之列使舞者或坐或伏皆低仰有節邱風簡兮右手秉翟此舞者所執王風君子陽陽左執翳此導舞者所執

爾雅盞謂之缶孫炎曰缶瓦器郭璞云瓦盆也據孔疏缶各不同易離卦九三鼓缶而歌則大耋之嗟樂器也坎卦六四樽酒簋二用缶酒器也比卦初六有

音學上卷 卷之二 二  
孚盈缶汲器也若詩所詠擊缶乃樂器卽史記蕭相  
如使秦王鼓缶之缶

東門之枌三則

序東門之枌疾亂也幽公淫荒風化之所行男女棄  
其舊業亟會於道路歌舞於市井爾詩翼曰殷制官  
刑儆於有位曰敢有恒舞於宮酣歌於室時謂巫風  
士有一於身家必喪邦君有一於身國必亡陳之史  
巫紛若初不過歌舞於宮室中國人男女化之終於  
亡國商書之言信哉

詩本義曰子仲之子莫知爲男也女也而鄭謂之男

子穀旦者善旦也猶今言吉日爾鄭謂朝日善明者  
何其迂耶南方之原毛以爲陳大夫原氏而鄭因以  
此原氏國中之最上處而家有美女附其說者遂引  
春秋莊公時季友如陳葬原仲爲此原氏且原氏陳  
之貴族宜在國中而曰南方之原何哉據詩人所陳  
當在陳國之南方也而說者又以不績其麻而舞於  
市者遂爲原氏之女皆詩無明文以意增衍而惑學  
者非一人之失也

陸堂詩學曰毛傳以子仲氏爲陳大夫若女子似不  
煩指斥矣路史註云子仲氏陳宣公子卽詩子仲之

子疑其世次太後婆娑其下婆娑舞也顏註歌舞以  
娛神尤確東漢曹娥碑亦第三云盱能撫節安歌婆娑  
樂神范史乃易爲於縣江沂濤迎婆娑神正如五髭  
十姨可發一榮

衡門二則

序言誘僖公歐陽本義極力推衍終覺牽合朱傳隱  
居自樂而無求義最直捷

可以樂飢鄭箋作樂飢說文樂治也唐石經依鄭作  
樂然樂字有簞瓢陋巷不改其樂意較樂字意味深  
遠泌毛傳作泉水或曰水名王氏總聞泌在南陽泌

陽縣

東門之池三則

序東門之池刺時也疾其君之淫昏而思賢女以配君子也朱傳此亦男女會遇之詞按此詩可與晤歌可與晤言絕無淫邪譴浪之意不得目爲淫詩逸詩云雖無絲麻無棄菅蒯雖有姬姜無棄憔悴卽此詩旨蓋以漚麻爲興詩人自有求匹之意但不必泥序說耳

水經注陳城故陳國也東門內有池池水東西七十步南北八十許步水至清潔而不耗竭不生魚草水



有故臺處詩所謂東門之池也

菅似茅而大其莖可爲屨爾雅白華野菅說者以爲  
漚治之名黃菅謂之蔽

### 東門之楊一則

序東門之楊刺時也昏姻失時男女多違親迎女猶  
有不至者也朱傳此亦男女期會而有負約不至者  
故因其所見以起興也按此詩乃泛刺無信爽約者  
不必定指男女楚辭曰黃昏以爲期羌中道而改路  
初旣與子有成言兮後悔遁而有他詩卽此意東門  
之楊所約之地也昏以爲期所約之時也至於明星

已出而尚不赴約無信之甚也鄭箋以楊葉牂牁爲  
三月中喻時晚失仲春之月明星煌煌爲親迎之禮  
以昏時女畱他色不肯時行乃至大星煌煌然皆拘  
泥不可從

### 墓門二則

春秋桓五年正月甲戌巳丑陳侯鮑卒左傳云再赴  
也於是陳亂文公子佗殺太子免而代之公疾病而  
亂作國人分散故再赴陸堂詩學曰序云刺陳佗也  
一語得之謂無良師傅則迂矣陳氏鵬飛曰此詩雖  
以刺佗乃是耆舊之賢者備見始末追咎先君不能

爲佗置良師傳致有弑逆之罪也左傳隱七年陳五  
父如鄭泣盟歆如忘洩伯知其不免則陳桓之寵佗  
必有踰制越禮如衛州吁齊無知之屬者而後釀成  
篡奪之禍篇中夫也不良顯然刺佗誰昔然矣桓公  
與有責焉讀墓門其知履霜堅冰之道者與

鵲一名鵲鵲一名鵲鵲一名鵲鵲天問何繁鳥萃棘  
而婦子肆情正用此詩陸璣曰鵲大如班鳩綠色惡  
聲之鳥入人家凶賈誼所賦鵲鳥是也其肉甚美可  
爲羹臠又可爲炙然鵲鳥似鵲非卽鵲也陸誤

防有鵲巢四則

序防有鵲巢憂讒賊也宣公多信讒君子憂懼焉朱  
傳此男女之有私而憂或間之之詞按宣公欲立嬖  
姬子欵而殺太子御寇其事與衛急子晉申生無異  
御寇之黨如敬仲其人者類皆有憂讒懼禍之心故  
是詩斷從序說

歐陽本義曰讒言惑人非一言一日之致必由累積  
而成如防之有鵲巢漸積構成之爾又如茗饒蔓引  
牽連中唐有蠶非一蠶也亦以積累而成旨鵲綬草  
雜衆色以成文猶多言交織以成惑義與貝錦同  
鄭箋所美謂宣公程子云子美爲心所賢者程說較

勝

唐堂途廟中之路甃甃甃砌徑之磚鵲綬郭璞云小草有雜色陸璣云鵲五色作綬文故曰綬草今名書帶草埤雅鵲本鳥名亦名綬鳥咽下有囊如小綬具五色此傳所釋鵲草之名豈因其似鵲而取義乎

月出一則

詩義折中解月出之首章曰皎明也佼人謂夏姬也僚好貌舒夏徵舒也古人二名間有截用一字者如晉重耳傳謂之重樂王鮒傳謂之鮒仲孫何忌經謂之忌是也陳靈公與孔寧儀行父淫於夏氏夏姬之子

徵舒恥之故弑靈公此詩言當月出之時靈公悅夏  
姬之佼好而其子徵舒幽竊糾結勢必爲亂故中心  
憂勞又悄然而不敢言也其次章曰皓月光白也慟  
美而清也優受憂思而忍受也慙煩亂也悄然不言  
而中心煩亂不知所爲也其卒章曰照月光照人面  
也燎人面亦有光也夭矯變紹糾繁慘哀痛也言其  
憂思而忍受者今天變而糾繁則禍發甚速故煩亂  
者至於哀痛知靈公之必不免也總案日月出憂靈  
公也淫之爲禍烈矣淫人之女如其父何淫人之妻  
如其夫何淫人之母如其子何當其月皎人僚色授

魂予之時而環伺而欲刃之者已不可勝計矣聖人錄月出使淫亂之人知懼愛愈甚則禍機愈烈庶幾有畏而中止非徒播靈公之惡於衆也臣鳳恭錄

### 株林二則

序株林刺靈公也宣九年左傳稱陳靈公與孔寧儀行父通於夏姬十年經云陳夏徵舒弑其君平國傳曰陳靈公與孔寧儀行父飲酒於夏氏公謂行父曰徵舒似汝對曰亦似君徵舒病之公出自其廐射而殺之夏姬左傳叔向之母云是鄭穆公少妃姚子之子子貉之妹也楚語云昔陳公子夏爲御叔娶於鄭

穆公女生子南子南之母亂陳而亡之是詩誌亂本也朱氏善曰衛之亂至牆茨而極於是有狄入衛之禍陳之亂至株林而極於是有楚入陳之禍然則狄非能入衛也宣姜實召之也楚非能入陳也夏姬實召之也此所謂女戎也比事以觀可以爲淫亂之戒矣

郡國志陳縣註陳有株邑蓋朱襄之地寰宇記陳州南頓縣西南三十里有夏亭城城北五里有株林按南頓城春秋頓子國頓子迫於陳而奔楚自頓南徙故曰南頓卽今商水縣在陳州府西南九十里



澤陂二則

序澤陂刺時也按魯詩說泄冶諫而死君子傷之頗爲近理大戴禮陳靈公殺泄冶而鄧元去陳以族從陸氏奎勲因疑是詩爲鄧元賦然無確據

爾雅荷芙蕖其莖茄其葉葢其本蔕其華菡萏其實蓮其根藕其中的的中薏詩首章卒章皆言蒲荷次章亦當爲荷不宜別據他草故鄭箋曰蒲當作蓮

詩學女爲卷十三

歙汪梧鳳著

國風

檜高辛氏之火正祝融之墟國在禹貢豫州外方  
之北榮波之南居溱洧之間祝融氏名黎其後八  
姓已姓昆吾蘇顧溫莒董姓驤夷參龍彭姓彭祖  
豕韋諸稽禿姓舟人姁姓鄢檜路偃陽曹姓鄒莒  
斟姓無後芊姓楚唯姁姓檜者處其地焉其國北  
鄰於虢國語史伯曰鄆仲恃險謂此平王時鄭武  
公滅檜而併其地左傳僖三十三年鄭葬其公子  
瑕於檜城之下杜預註故檜國在滎陽密縣東北  
今許州府密縣東北五十里有檜城

羔裘二則

序羔裘大夫以道去其君也國小而迫君不用道好  
絜其衣服逍遙游燕而不能自強於政故作是詩也

嚴氏曰凡人憂勞戒懼則不暇於外飾禹惡衣文王  
卑服衛文大布之衣是也檜君絜其衣服逍遙暇豫  
而一無所爲是偷安歲月而待亡也能無中心之悼  
哉

毛傳狐裘不言色玉藻狐裘黃衣以裼之又曰君衣  
狐白裘錦衣以裼之又曰君子狐青裘豹褰元綃衣  
以裼之是狐裘非一色也鄭箋大蜡而息民則有黃  
衣狐裘按孔疏引郊特牲蜡祭用素服息民之祭用  
黃衣是檜君以朝服燕以息民之祭服朝非大蜡之  
服也

### 素冠三則

序素冠刺不能三年也傳闡云世道交喪喪禮不終於是有所以得見素冠爲幸極其憂勞而愛慕焉斯固秉彝之在人心者耶何以知冠素者爲能終喪玉藻曰縞冠素紕旣祥之冠也蓋人子於親喪再朞而大祥祥後則將卽吉於是不以布爲冠而以縞然猶不以采爲緣而以素蓋雖漸易凶而不敢遽用吉詩人所願見謂其能舉祥祭者耳

喪禮期而小祥再期而大祥祥祭名去凶從吉之義自喪至此不計閏凡二十五月間一月爲二十六月

出月禪祭禪除服祭名禪之言澹澹平安意也通前  
爲二十七月故旣祥之冠行三年之喪者纔得見此  
此詩不言衰服但言素冠素衣素韠者蓋齊衰服雖  
不終喪之人亦有之也當時魯秉周禮勝爲卜正之  
後而三年之喪均不能行詩人蓋傷之矣言庶見者  
不可必而望之之辭也  
棘瘠也季本曰棘葉少而枝瘦故謂居喪骨立者爲  
棘人也爰爰毀瘠之貌

隰有長楚二則

萋楚小草也自枝而華自華而實欣欣向榮亦能自

遂其性今檜民政繁賦重不堪其苦至於小草之不如而羨其無知羨其無室家之累蓋卽兔爰之尚寐無覺苕華之不如無生也序謂國人疾其君之淫恣而思無情慾者說者遂以萋楚枝柔牽蔓比人之多慾而以未有牽蔓之時生意沃然者爲赤子之心其說牽強

陸堂詩學公羊曰鄭先君通乎檜夫人以取其國觀樂子之無室句興刺有因然而溫柔敦厚詩教也當以朱傳之說爲正

匪風三則

序匪風思周道也國小政亂憂其禍難而思周道焉  
或曰鄭桓以王室多故而咸林逼近西戎勢不可支  
謀諸史伯乃假王命東徙其民於檜號十邑則詩所  
云西歸疑亦當時怨刺之作陸陸堂曰咸林之民保  
漢中者爲南鄭以其初不願徙也旣願徙矣是甘爲  
桓用者必無怨刺之理誰將西歸懷之好音猶夫簡  
兮西方美人之思但衛想其盛檜則憂其危耳

漢書王吉傳引詩云匪風發兮匪車偈兮說曰是非  
古之風也發發者是非古之車也偈偈者義與毛傳  
同

孔疏引少牢禮祭之日雍人漑鼎廩人漑甑是漑滌  
皆洗器之名釋器云醴謂之鬻鬻銘也然則鬻是醴  
非釜類烹魚用釜不用甑雙舉者以其俱是食器故  
連言耳



詩學女爲卷十四

歙汪梧鳳著

國風

曹武王之弟叔振鐸之後也武王封之陶邱通釋云濟陰東北三十七里卽定陶故城曹所都也宋濟陰城在今曹縣西南六十里隋自定陶移曹州治濟陰縣金太定二十七年河決曹濮圯於水二十八年改築城於廢乘氏縣移曹州及濟陰縣治之春秋地名考略謂其地卽曹墟按乘氏城在今曹縣北五十里春秋時乘邱地高氏之說非也五禮通考曹都陶邱今爲山東曹州府曹縣顧氏祖禹曰曹城今州治卽曹叔振鐸所都按明初以水患再徙曹州於盤石鎮尋廢州爲縣今之曹縣盤石鎮也正統十年別置曹州於金人築城遺址今之曹州府卽乘氏縣也二說亦非是陸氏德明曰曹在兗州陶邱之北荷澤之野今濟陰定陶是也考荷澤在今曹州東南三十里陶邱在今定陶縣西南七里定陶縣在曹州東南五十里以譜而論曹都在定陶必矣今縣西北四里有定陶故城卽

其都也

### 蜉蝣三則

陸堂詩學此爲曹世子羈出奔而作春秋魯莊二十三年冬十一月曹伯射姑卒二十四年冬戎侵曹羈奔陳赤歸於曹杜預謂羈以微弱不能自定賈逵謂赤是戎之外孫故逐羈立赤據詩所云蜉蝣掘閱麻衣如雪譏赤之在喪竊國心之憂矣于我歸說說同稅望羈之歸而追服也作此詩者卽曹赤所殺之大夫說雖有見然無確據王伯厚云蟋蟀儉而蜉蝣奢不如從序云刺奢爲無弊

蜉蝣蓋羽蟲似粉蝶者今之飛蛾郭璞陸璣皆謂有  
角甲蟲非是

掘閱毛傳容閱也鄭箋掘地鮮閱孔疏掘地而出形  
容鮮閱按掘說文作崛突也閱鮮澤之意與管子掘  
閱得玉異管子閱通穴人力所穿也此詩掘爲突化  
蟲自出也

### 候人五則

序候人刺近小人也共公遠君子而近小人焉按詩  
言小人德薄才淺只合如候人之徒荷戈及備迎送  
而已乃赤芾乘軒優游朝著譬之鷄志在水是宜求

魚於澤乃反取鮑於梁不濡翼味是何不食其力而無功受祿也其又何能稱其服而遂其厚寵乎末言小人相援並進蒼蔚雲蒸賢者抱道窮處婉孌不字國欲治得乎春秋傳晉文公入曹數之以其不用僇負羈而乘軒者三百人易曰負且乘致寇至此之謂也

孔疏夏官序云候人上士六人下士十有六人史六人徒百有二十人身荷戈殺謂作候人之徒屬非候人之官長也

三百赤芾芾韍也亦謂之韠卽蔽膝天子韍色赤而

體直其繪龍火山諸侯韍在國則朱朝王則赤芾其  
體前後方其繪火山大夫韍一命緼韍卽韎韐再命  
三命赤韍其體前方後挫角其繪山此助祭冕服之  
韍也若祭於已則朝服用素韍士無韍有韎韐前後  
正天子之士直諸侯之士方禮書曰韠者芾之通稱  
而芾與韎韐異其名所以尊祭服也君韠以朱而諸  
侯朝王以赤芾詩曰赤芾在股赤芾金舄是也非朝  
王則亦朱韍采芑之詩可證也瞻彼洛矣言作六師  
而韍以韎韐者蓋兵車韋弁服韋弁服纁裳故貴者  
以朱芾卑者以韎韐卽所謂緼芾也曹爲伯爵大夫

再命故服赤芾

鵜卽鵜鵠水鳥別名洿澤又呼爲淘河見爾雅郭註按鵜當入水求魚今乃處魚梁而不濡其翼不濡其味所謂不稱也得魚而食非取之必竊之也故以爲小人之竊祿而不稱其服者况焉

毛傳南山曹南山也按曹南山在今曹縣南八十里春秋僖十九年宋公曹人邾人盟於曹南是也俗謂之土山范氏以爲曹之南鄙杜氏以會於曹南謂在曹之都者非是

鵠鵠三則

孔疏玉藻說大帶之制云天子素帶朱裏終辟諸侯素帶終辟大夫素帶辟垂士練帶率下辟是大夫以上大帶用素絲故言絲也

其弁伊騏毛傳騏騏文也弁皮弁也鄭箋騏當作璫以玉爲之孔疏顧命四人騏弁執戈註云青黑曰騏是弁作青黑色非璫玉之皮弁禮無騏色之弁而顧命有之者以新王卽位特設此服使士服此騏弁執兵衛王璫常服也此言諸侯常服故知騏當作璫按皮弁以白鹿皮爲之禮書曰皮弁存毛順物性而制之文質具焉韋弁去毛違物性而又染之文而已此

詩朱傳既主皮弁則必非染皮爲蒼黑色者而云駢  
馬之青黑色者弁之色亦如此誤當從鄭箋璫飾爲  
是璫禮書作璫縫中貫玉而施於下者天子十二公  
九侯伯七子男五孤四三命之卿三再命大夫二淇  
與曰會弁如星言其玉也此篇曰其弁伊騏言其文  
也

毛傳鴈鳩秸鞠也按鴈鳩或謂之布穀或謂之郭公  
春秋傳鴈鳩氏司空也杜註鴈鳩均平故爲司空平  
水土方言溷鴈鳩戴勝爲一失之

下泉三則



序下泉思治也曹人疾共公侵刻下民不得其所憂而思明王賢伯也按詩說以爲東遷之初曹人憫周而作愚謂此詩刺晉文與衛之木瓜遙對嚴氏曰曹公之時晉文霸矣襄王命之爲侯伯而下泉顧思明王賢伯何耶文之於曹執其君分其田以私憾而欲甘心焉後乃僅以貨免文寧能帖曹乎下泉愧木瓜矣

冽字從冰寒也下泉以比晉文之涼薄稂童梁禾之秀而不實者蕭蒿也稂蕭本非嘉種謂共公亦自取也

左傳畢原鄭郇文之昭也服虔曰郇國解縣東郇瑕氏之墟竹書昭王六年王錫郇伯命是繼邵公爲西伯也僖二十四年咎犯與秦晉之大夫盟於郇杜註解縣西北有郇城按晉武公滅郇以賜大夫原氏黯是爲甸叔地在今蒲州府臨晉縣東北十五里

詩學女爲卷十五

歎汪梧鳳著

國風

幽漢志右扶風栒邑有幽鄉詩幽國公劉所都今  
陝西邠州三水縣西三十里詩譜曰其封域在禹  
貢雍州岐山之北原隰之野周自后稷封邠今陝  
西西安府乾州武功縣西南二十里古蘆城括地  
志一名武功城有后稷及姜嫄祠其後當夏之衰  
不窋失官自竄於戎狄之間今慶陽府安化縣有  
不窋城府東三里有不窋塚公劉思舊土復得有  
邠故地乃邑於幽而居之幽在邠北百餘里不窋  
城又在幽北二百里舊謂公劉后稷之曾孫自邠  
徙幽史失其傳也則世之國無幽故繫於國風之  
末

七月十六則

此篇大義以衣食爲本農桑爲經而昏姻祭祀田獵

宮室具焉此王道之全也詩解頤曰七月之詩以衣食爲急而衣食所資以豫備爲貴必以七月爲首者三陰之月陰氣始盛故於是而豫爲禦寒之備三陽之月陽氣始盛故於是而豫爲治田之備先衣而後食故以七月爲首也大寒之候在於丑月而圖之於建申之時收成之候在於酉月而慮之於建寅之日其爲豫備可知若寒至而後索衣飮至而後索食則其爲計亦晚矣二章曰幽民以流火爲授衣之漸故於春月將蠶之候蠶之新出者則求稗桑以養之蠶之未出者復求白蒿以洗之此見其趨事之勤也而

其許嫁之女豫以將及公子同歸而遠其父母爲悲  
此見其秉心之厚也此所以爲邪俗也三章曰上章  
於春日而求桑以養蠶爲今年授衣計也此章於八  
月在葦旣成而豫畜之以爲曲薄爲明年養蠶計也  
上章求穉桑以養其始生者采白蒿以洗其未生者  
此蠶事之始也此章於桑之大者條取之桑之小者  
猗取之蠶盛而大小畢取此蠶事之成也蠶事旣成  
又於鳴鵲之候而績其麻以爲布蓋蠶之所成者可  
以供老疾給昏嫁奉君上而已非績麻以爲布則固  
無以爲少者壯者之供也蠶績旣成然後染之或以

爲元或以爲黃而其朱者尤爲鮮明且以供上而爲公子之裳其風俗之厚如此豈一日之積哉四章曰四月純陽而微陰已萌蓂感之而蚤秀五月一陰成象蜩感之而始鳴八月正秋物成而禾之早者可穫十月陰氣已極而木之隕者爲摶四者見陰氣以漸而至將寒之候也西北地寒非狐貉之厚無以禦之然貉賤而狐貴賤者以自奉貴者以奉公也至於二之日則又竭作以狩續繼武功而私其一歲之縱獻其三歲之狝焉於裘則私其賤而奉其貴於物則私其小而奉其大其薄於已而厚於君如此五章曰由

動股而至於入我牀下所以感時物之屢變由穹窒而至於墻戶入室所以盡人事之當爲幽民於衣食之奉必先老而後幼先貴而後賤獨於改歲入室則老幼貴賤同之所以廣其愛也六章曰此章當看介眉壽食農夫六字鬱奠之食葵菽之烹棗之剝而春酒之爲皆介眉壽之事介有助之之意則非以爲常食也瓜之食壺之斷苴之叔茶之采而樗之薪皆食農夫之事食有養之之意固以是爲常矣然則果酒嘉蔬非不可以及少也而供老疾奉賓祭之意多瓜壺苴茶老者未必不食也而不可以爲常於是見食

稻食肉乃老者之常而果酒嘉蔬則又於常食之外  
專以此而致其助也有常食以養之而又有美味以  
助之此幽人之老所以無凍餒也與七章曰稼之既  
同者可以少休也而卽念夫邑居之當修屋之方乘  
者可以少緩也而復念夫農功之當始其於築而納  
之也有以見歡欣鼓舞之意於其亟而乘之也有以  
見勸勉戒飭之意事有始終而其憂勤艱難則無間  
於始終此所以爲厚也與八章曰鑿冰藏冰其供上  
役也爲甚勤肅霜滌場其畢農功也爲甚速故其開  
冰也獻羔以祭司寒祭韭以薦寢廟君旣得以致其



誠於神其務閑也殺羊以獻於公舉酒而祝其壽民復有以致其忠愛於君可謂上下相親之甚矣

火心星也晉天文志東方心三星天王正位也中星曰明堂天子位前星爲太子後星爲庶子堯典仲夏火中大火也大火次名東方之次有壽星大火析木三者大火爲中與此大火心星者異鄭箋大火者寒暑之候也火星中而寒暑退故將言寒先著火所在戴氏震曰據周季夏火昏中故孟秋始不正值南方而西下若堯典之日永星火以正仲夏夏小正之五月初昏大火中則流火自六月矣所以異者日左旋

一周而成晝夜恒星左旋速於日恒星謂之經星平

分之爲十二次爲三百六十度

用邵子之率

一晝夜幾過

一度

今步算家謂日左旋一度

漸進至一月而過一次滿一歲之

日

三百六十五日幾三日

則幾復其故處所差甚微約三千六

百分度之五十一

今步算家一度爲六十分一分是爲六十秒則差五十一秒也

爲恒星差

昔人謂之歲差西洋人謂之恒星東行

蓋以其過而稍不足

一周者爲差鎮星

土星

熒惑

火三者之差亦生

於過太白

金星

辰星

水星

三者之差則生於不及在日

上者愈遠其行愈速故過在日下者愈近下其行愈

遲故不及寒暑晝夜皆繇於日當準之以爲中數無

過不及明矣積恒星所差二千一百餘年而移一次  
故堯典夏小正之列宿合之詩經左傳月令周髀其  
差移一次今則又一次矣如此十二次遞改二萬五  
千餘年乃復從其始昔人創歲差之說始於虞喜尚未得  
其所以然強分周天歲周亦曰歲實謂歲周不盡周天此  
乃以恒星之過而稍不足一周者反言之爲日之退  
而歲不滿一周也今步算家又謂恒星循黃道東行  
則不足之差數以爲退行所實歷失理之實無異前  
說恒星七政在天道本順而盡目爲逆豈非言天者  
之大惑乎此日月五星左旋之說也愚謂天體左旋

言星之義 卷之三  
最速處其中者以漸而進恒星稍不及天故有歲差  
填星次之故二十九年而右旋周天歲星又次之故  
十二年而右旋一周熒惑又次之故二年而右旋一  
周日又次之金水又次之故皆一年而右旋一周月  
最下故二十七日餘而一周此西學分天九層之說  
也其以日月之左旋爲右旋是卽以左旋不及之度  
爲右旋之度此歷家推算捷法故朱子詩傳十月之  
交章定日月右旋書經堯典蔡傳定日月不及天其  
實一也歲差之故以天運恒餘而經星在天稍促則  
經星亦有右旋之度但微而難覺耳帝堯甲辰冬至

日在虛七夏不降乙未退女十一商武乙丙寅退斗  
末周簡王丁亥退斗二十三秦莊襄王壬子退斗二  
十一月令孟春之月日  
在營室秦時歷也漢太初元年丁丑退斗二十  
晉太元九年甲申退斗十七宋元嘉十年癸酉退斗  
十四唐開元十二年甲子退斗十宋慶歷四年甲申  
退斗五度宗四年戊申退箕三今之冬至日在箕一  
度內道交室末壁初外道交翼十七帝堯至今四千  
餘年歲差五十九度合算之劉焯七十五年而差一  
度之數爲近然差亦有遲速未易定算也因戴說而

附論及之

公劉正當夏時所用者夏正而一之日斗建子二之  
日斗建丑蘇氏以爲月用夏正日用周正者非也戴  
震曰子丑寅卯之月變言日者自大撓作甲子以十  
二子爲地支分奠四方東寅卯辰南巳午未堯典又  
以四方配四時春東夏南秋西冬北則十二子之爲十二月建  
繇來久矣以之繫日子爲一丑爲二以次而終十二  
月之日詩之屬辭不可云十有一月十有二月故變  
文一之日二之日爾正月二月之稱三之日四之日  
文連及也九月十月不可云十一之日十二之日故  
卒章因二之日連至四之日下變文九月十月第四

章有十月有一之日二之日亦變文也先儒不知屬辭宜然往往失之鑿詩中又曰春日曰蠶月紀時之法不泥於一而要之祇用夏正非雜舉周正是以二之日而下言卒歲所謂月建者配之而當其位曰建言斗杓所指者失之也斗杓古今差移豈可通之久遠乎毛氏寫官記曰維日爲陽自子逮巳析支之前而爲陽陽故當以日名之一之日二之日是也維月爲陰自午逮亥析支之後而爲陰陰故當以月名之七月流火九月授衣是也所謂別陰陽以紀日月者也然而又曰四月秀萋何也夫四月巳月也巳者承

陽而首陰故稱日可始於子而迄於巳稱月則又可  
始於巳而迄於亥然而不曰五之日何也曰偶不及  
耳惟其然亦未嘗有稱三月者說本許氏謙詩中以  
日爲言者雖爲建子之義其實主於陽而言之其說  
未爲無見存之

甫田箋田畯司嗇今之嗇夫也愚謂周禮無田畯惟  
見於豳風及甫田大田二詩二詩本豳雅蓋俱沿豳  
國之舊疑是夏官箋以今嗇夫解之知古亦有是官  
而異其名以意推之其爲夏官無疑也

夏小正傳云未秀則不爲萑葦秀然後爲萑葦又曰



萑未秀爲莢葦未秀爲蘆蔡元度曰莢萑之始生者也萑薶也萑之成體者兼兼也萑之未秀者莢青而後潔故曰毳衣如莢白露降然後萑可以爲用故曰八月萑葦

續詩傳鳥鳴卷曰鵙爾雅作伯勞說文作博勞春秋傳作伯趙其又名鵙以其聲鵙鵙然也然又作鵙鵙以鵙鵙通字也特鵙以鳴顯則其鳴有時而此云七月與月令仲夏鵙始鳴不合因之有謂周正七月卽夏正五月者然而詩文多用夏正不應此一物獨改周正鄭箋謂幽地晚寒故物候較晚則幽在雍岐之

北早寒有之焉得晚寒於是王肅直斷曰七月是五月之誤殊不知鵙鳴之時諸書顯然春秋傳以伯趙氏爲司至之鳥謂其夏至鳴冬至止故名司至則夏至原是仲夏亦正是五月故易通卦驗云博勞夏至應陰而鳴冬至而止帝少皞以爲司至之官而樊光爾雅註亦云伯趙司空以夏至來冬至去是以大戴禮五月鵙鳴逸周書芒種又五日鵙始鳴則鵙鳴始於五月而終於十一月此先後一辭者其云七月非謂至是始鳴特以七月之鳴啓八月之續謂鵙是陰鳥鳴則陰生所當戒陰寒而興女功故特以七月八

月爲戒寒之候蔡邕所云鵲應時而鳴是爲陰候楚辭恐鵲鳩之先鳴兮使百草爲之不芳是也

四月秀萋鄭箋疑萋爲王荇劉向說萋味苦謂之苦萋西河毛氏詩札云王荇卽呂覽中所謂王薺月令中所謂王瓜者萋卽呂覽所謂苦菜者其說從劉駁鄭似矣然萋固非王荇亦非苦菜爾雅茶苦菜說文茶苦茶則苦菜卽此詩六章九月所采之茶其非四月之萋明矣戴震曰萋夏小正謂之幽四月王荇秀秀幽書傳通謂之莠萋國策幽莠之幼也似禾或合言或分言者猶杜衡之或去杜或云衡也考韋氏昭

詮甫田維秀曰莠草今之狗尾也幽莠旣一物似亦  
非莠陸堂詩學引唐山夫人歌豐草莠注莠盛貌因  
謂以秀莠形草之綠猶以隕穉形木之落然秀秀出  
也草滋於春不應孟夏始秀而盛不可據按爾雅莠  
繞棘苑註今遠志也其上謂之小草本草遠志又有  
棘苑繞莠細草三名四月采根葉陰乾故曹氏以莠  
爲遠志詩緝及名物鈔從之可爲定論

鄭箋于貉往搏獸以爲裘也狐狸以共尊者寫官記  
曰周禮大司馬大蒐則有司表貉甸師大田獵則祭  
表貉貉者獵祭也故羅氏爾雅云周人將獵則先祭

貉因稱獵爲貉然則于往也往祭貉而獵也說亦有見

朱傳縱一歲豕豸三歲豕本毛傳然廣雅又云獸一歲爲縱三歲爲肩則是凡獸名不止豕也周禮註亦曰獻肩于公

斯螽蝗類以兩股相切作聲卽周南之螽斯莎雞小蟲黑身赤頭以翼鳴者卽爾雅之輪一名天雞一名絡緯俗謂之紡婦蟋蟀一名蜚一名精裂楚謂之王孫幽州謂之促織明是三物朱傳一物隨時變化誤在野在宇在戶農人之居處也寒漸至則人之居處

漸卽於內不惟人卽於內至十月而蟋蟀入我牀下  
矣見寒氣之漸逼也戴氏曰動股者斯螽也振羽者  
莎雞也入我牀下者蟋蟀也明舉三物以紀候而在  
野在宇在戶不言物則以人之早晚居處見將寒之  
候也物候人事相錯言焉李氏樗以在野在宇在戶  
皆指蟋蟀非是

曰爲改歲先儒以爲豳公創國卽有十月改歲之俗  
按漢書食貨志春令民畢出在野冬則畢入於邑冬  
民旣入婦人同巷相從夜績女工一月可得四十五  
日豳民之婦子旣將入室則出而治田必待改歲矣

非謂改歲然後入室也

鬱車下李一名唐棣一名白移莫郁李一名莫蓼一名常棣詳見召南

周禮凌人掌冰正歲十有二月令斬冰註正歲季冬火星中大寒冰方盛之時正謂夏正疏正歲謂夏之建寅爲正十有二月謂建丑之月冰堅腹厚之時令入山斬冰禮記月令仲春之月獻羔開冰先薦寢廟詩二之日鑿冰冲冲十有二月斬冰之候也四之日其蚤獻羔祭韭開冰薦廟之候也與月令凌人悉食故春秋傳曰七月之卒章藏冰之道也

朋酒羔羊謂歲時伏臘農事畢而燕樂耳朱傳引鄉  
飲酒禮兩尊壺於房戶之間謂兩尊曰朋此豳公之  
事非小民所得行

### 鷓鴣二則

序鷓鴣周公救亂也成王未知周公之志公乃爲詩  
以遺王名之曰鷓鴣焉按朱傳以鷓鴣爲誅武庚後  
作從尚書金縢孔傳之說也其後與蔡九峯論金縢  
帖曰弗辟之說只從鄭氏爲是向與董叔重亦辨此  
一條一時信筆答之謂當從古註說後來思之不然  
是時三叔方流言於國周公處兄弟骨肉之間豈宜



以片言半語便遽興師以誅之聖人氣象大不如此  
又成王方疑周公不應不請而自誅之若請之  
於王亦未必見從則當時事勢亦未必然此朱子晚  
年之定論也今金滕蔡傳從鄭說本朱子特朱子於  
此詩未及改正耳愚謂流言之起在三叔而詩意所  
憂在武庚故首章曰鴟鴞鴟鴞既取我子無毀我室  
恩斯勤斯鬻子之憫斯蓋知煽惑三叔使陷於罪者  
實由武庚又有以知武庚之所以煽惑三叔使搖已  
者意不在害已而欲傾覆我國家且又不以流言爲  
讐而以陷之於罪爲痛則仁之至也曰無毀我室慮

畔於未畔也二章曰迨天之未陰雨則及其未畔而豫圖弭畔之道身雖在外而禦侮之計未嘗去懷忠之至也三章曰拮据將茶蓄租卒瘁言前之積累勤勞至今而國勢未安也國勢未安而多難乘之風雨飄搖國將傾覆鷓鴣不得不作矣此卒章所謂予維音嗟嗟也是篇與禱疾祝冊之言同一悲痛迫切如謂東征以後所作則本詩詞義皆無著落矣詩在東山前是貽詩在前東征在後方麓王氏亦云

鷓鴣一名怪鷓鴣晝常伏處至夜每出攬他鳥子食之莊子所謂晝則瞑目夜能撮蚤察毫末者爾雅鷓鴣

鷦鷯而陸璣以鷽鷽小鳥當之鷽鷽卽黃脰鷽鷽卽  
快降鳥陸疏誤

東山七則

序東山周公東征也朱傳東山所征之地也王伯厚  
曰秦漢謂山東山西者皆指太行山東山卽商地按  
小雅出車杕杜勞還師還役之詩與六月采芑功成  
凱歌之詩類皆以對壘之威武臨戎之車馬點綴成  
篇乃周公東征平武庚管蔡霍奄淮夷徐戎滅國五  
十而此詩只詳歸士悲喜之情無一語及東征之事  
蓋變生骨肉在周公實有大不忍言者故首章曰我

東曰歸我心西悲蓋悲三叔之陷於罪也嗚呼仁矣  
邵子謂東征在丙戌年平於戊子愚謂周公居東二  
年然後東征當在戊子出師而歸於庚寅

制彼裳衣勿士行枚卽散軍脫劔之意言東征旣歸  
勿再戎服以事行陳銜枚也鄭箋以裳衣爲兵服以  
善用兵者不陳釋勿士行枚非是

爾雅蚘烏蠋郭璞曰大蟲如指似蠶毛傳桑蟲也按  
蠋五采有角非桑蟲埤雅蠋以絲自裹羅願曰蜀葵  
中蟲也亦食於藿蠶類不食桑詩乃稱烝在桑野者  
葵藿之地亦桑野之地也伊威鼠婦陸佃曰爾雅伊

威委黍一名鼠負因濕化生俗謂之濕生按伊威俗名潛馳非鼠負町疃說文田踐處註禽獸所踐處也與毛傳鹿跡合熠燿爾雅謂之𤔔𤔔莊子謂之腐蠃宵行夜飛往來也朱傳以宵行爲蟲名無據陸堂詩學以蠶尾有光之蛆螢當之亦屬牽合或又疑末章以鳥羽之光爲熠燿與熒火之名相戾楊氏慎曰古人用字有虛有實熠燿之爲螢火實也熠燿爲倉庚之羽虛也如小雅交交桑扈有鶯其領此言桑扈之領如鶯之文非謂鶯卽桑扈也彼謂倉庚之習如熠燿之明非謂熠燿卽倉庚也此說當矣鶴似鶴而頂

詩經卷之五  
不赤項無烏帶莊子稱觀雀後漢楊震傳稱冠雀食  
經鸛仰鳴則晴俯鳴則雨或者在垤俯鳴故知將雨  
若如穴居知雨蟻出而鸛就食之則鸛捕魚而食長  
喙必不能蠋蚍蜉之小蟲故毛傳但言鸛好水長鳴  
而喜不言食蟻也

### 破斧二則

序破斧美周公也周大夫以惡四國焉按此乃美周  
公之詩非惡四國也毛傳承序之誤遂以四國爲管  
蔡商奄者非是嚴氏粲曰詩不曰弓矢干戈矛戟而  
專言斧斨錡錄者蓋東征之師不尚殺戮若除道樵

蘇斧斲之用爲多歷時久而破缺也錄無明訓釋文云今之獨頭斧

管今河南開封府鄭州蔡今河南汝寧府上蔡縣霍今山西平陽府霍州商謂武庚都紂故都朝歌故城在今衛輝府濬縣奄地未詳所在左傳蒲姑商奄吾東土也又云魯公因商奄之民則奄是東方之國近魯之地也括地志兗州府曲阜縣奄至卽奄國之地疑此卽杜氏所謂迸散在魯者其後故得奄名非奄之初封在魯也書序稱成王踐奄則東征之日周公討而定之未嘗滅其國至歸政後成王始滅之而徙

其君耳孟子周公相武王誅紂伐奄則周公凡兩次  
伐奄猶未能蕩平至成王始滅之也

伐柯二則

序伐柯美周公也按伐柯九戢狼跋三詩有袞衣赤  
舄之容無踴躍干戈之氣此居東二年東人美公之  
詩東陝以東周公分治之地也周公之輔王執政與  
諸侯之入爲卿士同避位居東與諸侯之歸藩就國  
同非東征之太行以東也先儒混居東爲東征故說  
三詩者往往牽合愚謂伐柯東人知禮也首章知婚  
姻之禮次章知俎豆之禮此猶箕子封朝鮮施教八



條而男恥爲盜婦人貞信聖人過化存神其感移之速如此故曰我觀之子邇豆有踐我東人自我之子謂周公朱傳謂之子指其妻言非是

居東之說有欲宗尚書孔註者東匯陳氏曰豳風諸詩其言與金縢所書皆昭然相合大誥序言武王崩三監及淮夷叛金縢言武王旣喪管叔及羣弟流言則流言與叛皆在武王始崩之時不得分兩節矣亦非養寇三年而始征也成王幼未親政凡事皆理於師傅二公居中調護成王中心雖不能無疑亦未敢明沮周公之行兼成王諒闇國家之事惟冢宰是任

周公固可專其事矣四國之變征之少緩則蔓延莫  
遏周公豈顧一己之小嫌忘宗社之大計哉迨夫三  
監伏辜居東以俟朝命而不欲遽歸此則公之避遠  
權勢以待成王之悟以經證經不必遷就牽合矣新  
安程氏曰居東便是屯駐以東征鴟鴞詩云旣取我  
子便是武庚旣敗我管蔡三年而歸便是成王因風  
雷之變迎公以歸首尾關涉三年謂二年三年皆可  
耳二家釋金縢居東皆宗孔註後儒釋幽風者往往  
同之愚謂不然幽風之詩七月鴟鴞東山皆周公作  
也故附鴟鴞東山於七月之後破斧歸士答周公也

故附東山之後伐柯九戩狼跋三詩東人爲周公作也故又附破斧之後若書序本不足信且大誥主於征武庚而序乃只言三監及淮夷叛與經意亦不相合周公位冢宰正百官事可專行然征伐大事要必不可不稟王命而行如禹雖總師而征苗亦由舜命也如不稟王命而興師而大誥又稱王若曰則是周公矯詔矣况三叔之罪不過流言經文並未遂加叛字武王方崩未有瑕釁三叔亦安得遽叛周公徒以流言之故遽而興師是不主於誅武庚以靖國家而實主於忿流言以戮其兄弟周公之聖固如是乎而

大誥又何以無一言及三叔耶大概三叔之意本只  
疑忌周公原非有心於叛三叔未有叛心武庚亦不  
敢遽動及夫周公避位居東則不利於孺子之言不  
驗而朝廷又訪知流言所起則三叔自知其罪不可  
逃又武庚益從旁煽之三叔內不自安折而與武庚  
叛是則事勢相迫有以使之然也然則武庚及三叔  
之叛實在成王旣感風雷而迎公以歸之後而不在  
武王方崩之日流言與叛原分二侯不得合而一之  
矣東齋之謂三監伏辜則居東以俟朝命而不敢遽  
歸以待成王之悟夫公之出師可以不稟王命而遽

出功成以歸反欲待王悟而不敢遽歸何公之前倨  
後恭乎此又以見其說之自相矛盾矣況討畔而卽  
自鎖其地其視韓淮陰據全齊而有之者何以異乎  
程壽翁云金縢曰我之弗辟而下卽曰居東則是避  
而居東其說是也至謂屯駐以東征則是周公屯駐  
東方二年並未見是征討又如何罪人斯得也愚按  
周公避位居東非如後世要君者託避以待迎復亦  
非如懟君自潔者遠引以絕聞見不過謝冢宰之重  
任歸分陝之舊封猶之出就藩國同於閉門待罪耳  
故得自舉其職民被其休而東人之頌聲作矣故觀

以爲征東之東者固非卽尚書蔡傳以東爲國之東  
偏不知何地而周公得治之王肅以東爲洛邑豈周  
公營之遂可無王命而往治之乎愚故曰居東在東  
征前而東卽初受命於文之采邑所謂陝以東周公  
主之者是也

九罍二則

朱子語錄此東人願畱之詩最爲直捷說詩者泥序  
說刺朝廷不知之句委曲附會可謂詞費陸奎勲曰  
鱗魴大魚而處九囊小網喻周公聖人乃畱滯於東  
方鴻宜高飛遵渚遵陸亦喻失所蓋東人願公之畱

而預知其必不能畱也

爾雅疏九罟謂魚之所入有九囊詩緝毛以爲小網諸家或以爲大網郭璞言有百囊網則九囊者不得爲大又有不及九囊者則九囊亦不甚小蓋常網也

狼跋二則

詩所老狼領下有胡進而躡其胡則爲所牽返而跲其尾則爲所曳以其性貪故也周公聖者無所欲於天下雖有大美遜而不居而況與人爭利哉按以狼與公擬人失倫上二句特以喻管蔡流言自取顛躓而歸美於公之居東爲能身名俱泰也劉原父七經

小傳云公孫者幽公之孫謂周公也毛以公孫爲成王鄭以公孫爲公遜後之說詩者皆從鄭作遜愚謂不如劉義直捷

禮書鄭氏釋周禮謂複下曰舄禪下曰屨凡屨舄各象其裳之色舄有三等赤舄爲上冕服之舄下有白舄黑舄王之吉服九而舄三赤舄配冕服而黑絢纁純白舄配皮弁服而青絢纁純黑舄配冠弁服而赤絢纁純詩云赤舄几几元衮赤舄赤芾金舄周公及諸侯冕服之舄也赤舄謂之金舄者鄭氏謂金舄黃朱色也考之於禮周尚赤而灌尊黃彝纁裳赤黃馬



黃朱而諸侯之節亦黃朱則烏用黃朱宜矣